

Broj: 07-13-2-471-2/24
Mostar, 29.4.2024. godine

Na osnovu člana 109. stav (4) i člana 169. stav (1) Zakona o električnoj energiji Federacije Bosne i Hercegovine („Službene novine Federacije BiH“ broj 60/23), člana 11. stav (4) Pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača („Službene novine Federacije BiH“ broj 22/24) i Odluke Vlade Federacije BiH o utvrđivanju pružaoca javne/univerzalne usluge i usluge rezervnog snabdjevača („Službene novine Federacije BiH“ broj 84/14), Regulatorna komisija za energiju u Federaciji Bosne i Hercegovine - FERK je na XI redovnoj sjednici održanoj 29.4.2024. godine donijela

ODLUKU
o utvrđivanju cijena snabdijevanja krajnjih kupaca kod javnog snabdjevača
JP Elektroprivreda BiH d.d. - Sarajevo

Član 1.

Ne daje se saglasnost JP Elektroprivreda BiH d.d. – Sarajevo, kao imaocu dozvole za snabdijevanje električnom energijom - dozvole I reda i javnom snabdjevaču na prijedlog cijena snabdijevanja krajnjih kupaca kod javnog snabdjevača, sadržane u Prilogu 1 Odluke o utvrđivanju prijedloga cijena javne usluge snabdijevanja JP Elektroprivreda BiH d.d. – Sarajevo broj: NO-11060/24-28./4. od 8.4.2024. godine.

Član 2.

(1) Utvrđuju se cijene snabdijevanja krajnjih kupaca kod javnog snabdjevača JP Elektroprivreda BiH d.d. – Sarajevo kako slijedi:

CIJENA USLUGE JAVNOG SNABDJEVAČA - JPEPBİH										
TARIFNI ELEMENTI	JEDINICE MJERE	DIFERENCIIRANJE	DOMAĆINSTVA		OSTALA POTROŠNJA					JAVNA RASVJETA
			I tar grupa	II tar grupa	I tar grupa	II tar grupa	III tar grupa	IV tar grupa	V tar grupa	
1	2	3	4	5	6	7	8	9	10	11
MJERNO MJESTO KUPCA	KM		4,80	4,80	9,65	6,90	4,80	4,80	6,90	6,00
OBR. SNAGA	KM/kW/mjesec				16,52					
AKTIVNA ENERGIJA	fening/kWh	VEĆI	13,46	16,82	14,89	23,91	13,46	16,82	19,13	21,09
		MANJI		8,41	7,45	11,95		8,41		
PREKOMJERNO PREUZETA REAKTIVNA ENERGIJA	fening/kvarh				3,22					

- (2) U cijenu iz stava (1) ovog člana nisu ukalkulisane naknade i iznos poreza na dodatu vrijednost koje su javni snabdjevači obavezni evidentirati na svakom individualnom računu krajnjeg kupca u skladu sa važećim propisima.

Član 3.

Kategorije potrošnje su:

- a) domaćinstva, koja električnu energiju preuzimaju na 0,4 kV naponskom nivou,
- b) ostala potrošnja, koja električnu energiju preuzima na 0,4 kV naponskom nivou,
- c) javna rasvjeta, koja električnu energiju preuzima na 0,4 kV naponskom nivou.

Član 4.

(1) Grupe unutar kategorije potrošnje domaćinstva su:

- a) I tarifna grupa, kupci koji posjeduju odgovarajuće brojilo električne energije i kojima se obračun potrošnje tarifnog elementa aktivna električna energija vrši prema jedinstvenom tarifnom stavu tokom dana,
- b) II tarifna grupa, kupci koji posjeduju odgovarajuće brojilo električne energije i kojima se obračun potrošnje tarifnog elementa aktivna električna energija vrši prema manjim i većim dnevnim tarifnim stavovima,

(2) Kupcima I i II tarifne grupe iz ovog člana, obračunava se izmjerena aktivna električna energija i mjesečna naknada po mjernom mjestu kupca.

Član 5.

(1) Grupe unutar kategorije ostala potrošnja su:

- a) I tarifna grupa, kupci priključeni na 0,4 kV napon, koji nisu domaćinstva niti javna rasvjeta, a koji isključuju kupce iz tački c) i d) ovog stava i imaju priključnu snagu iz elektroenergetske saglasnosti veću od 23 kW i istu ne mogu mijenjati i prelaziti u neku drugu tarifnu grupu,
- b) II tarifna grupa, kupci priključeni na 0,4 kV napon, koji nisu domaćinstva niti javna rasvjeta, a koji isključuju kupce iz tački c) i d) ovog stava i imaju priključnu snagu iz elektroenergetske saglasnosti manju ili jednaku 23 kW, i posjeduju odgovarajuće brojilo električne energije i kojima se obračun potrošnje tarifnog elementa aktivna električna energija vrši prema manjim i većim dnevnim tarifnim stavovima,
- c) III tarifna grupa, kupci priključeni na 0,4 kV napon i to:
 - 1) jaslice, vrtići, obdaništa
 - 2) domovi za smještaj djece, učenika, studenata, vjerskih službenika, invalida, lica sa umanjenom sposobnošću, staraca i penzionera,
 - 3) vjerski objekti i kuhinje humanitarnih organizacija,
 - 4) privredna društva, ustanove i organizacije lica sa invaliditetom u skladu sa Zakonom o profesionalnoj rehabilitaciji, osposobljavanju i zapošljavanju lica sa invaliditetom („Službene novine Federacije BiH“ broj 9/10), koja posjeduju odgovarajuće brojilo električne energije i kojima se obračun potrošnje tarifnog elementa aktivna električna energija vrši prema jedinstvenom tarifnom stavu tokom dana,

- d) IV tarifna grupa, kupci priključeni na 0,4 kV napon i to:
- 1) jaslice, vrtići, obdaništa
 - 2) domovi za smještaj djece, učenika, studenata, vjerskih službenika, invalida, lica sa umanjenom sposobnošću, staraca i penzionera,
 - 3) vjerski objekti i kuhinje humanitarnih organizacija,
 - 4) privredna društva, ustanove i organizacije lica sa invaliditetom u skladu sa Zakonom o profesionalnoj rehabilitaciji, osposobljavanju i zapošljavanju lica sa invaliditetom („Službene novine Federacije BiH“, broj 9/10), koja posjeduju odgovarajuće brojilo električne energije, a kojima se obračun potrošnje tarifnog elementa aktivna električna energija vrši prema manjim i većim dnevnim tarifnim stavovima
- e) V tarifna grupa, kupci priključeni na 0,4 kV napon, koji nisu domaćinstva niti javna rasvjeta, a koji isključuju kupce iz tački c) i d) ovoga stava i imaju priključnu snagu iz elektroenergetske saglasnosti manju ili jednaku 23 kW, koja posjeduju odgovarajuće brojilo i kojima se obračun potrošnje tarifnog elementa aktivna električna energija vrši prema jedinstvenom tarifnom stavu tokom dana.
- (2) Kupcima I tarifne grupe iz ovog člana, obračunava se izmjerena aktivna električna energija, vršna snaga izmjerena u vrijeme primjene većih dnevnih tarifnih stavova (obračunska snaga), prekomjerno preuzeta reaktivna električna energija i mjesečna naknada po mjernom mjestu kupca.
- (3) Kupcima II, III, IV i V tarifne grupe iz ovog člana, obračunava se izmjerena aktivna električna energija i mjesečna naknada po mjernom mjestu kupca.

Član 6.

Kupcima iz kategorije potrošnje javna rasvjeta obračunava se izmjerena aktivna električna energija i mjesečna naknada po mjernom mjestu kupca.

Član 7.

- (1) Za kategoriju domaćinstvo veći dnevni tarifni stavovi primjenjuju se od 07.00 do 13.00 h i od 16.00 do 22.00 h, tokom zimskog računanja vremena.
- (2) Za kategoriju domaćinstvo manji dnevni tarifni stavovi se primjenjuju od 00.00 do 07.00 h, od 13.00 do 16.00 h i od 22.00 do 24.00 h, tokom zimskog računanja vremena, i nedjeljom.
- (3) Za kategoriju domaćinstvo veći dnevni tarifni stavovi se primjenjuju od 08.00 do 14.00 h i od 17.00 do 23.00 h, tokom ljetnog računanja vremena.
- (4) Za kategoriju domaćinstvo manji dnevni tarifni stavovi se primjenjuju od 00.00 do 08.00 h, od 14.00 do 17.00 h i od 23.00 do 24.00 h, tokom ljetnog računanja vremena, i nedjeljom.
- (5) Za kategoriju ostala potrošnja veći dnevni tarifni stavovi primjenjuju se od 07.00 do 22.00 h, tokom zimskog računanja vremena.
- (6) Za kategoriju ostala potrošnja manji dnevni tarifni stavovi se primjenjuju od 00.00 do 07.00 h i od 22.00 do 24.00 h, tokom zimskog računanja vremena, i subotom i nedjeljom.
- (7) Za kategoriju ostala potrošnja veći dnevni tarifni stavovi se primjenjuju od 08.00 do 23.00 h, tokom ljetnog računanja vremena.
- (8) Za kategoriju ostala potrošnja manji dnevni tarifni stavovi se primjenjuju od 00.00 do 08.00 h i od 23.00 do 24.00 h, tokom ljetnog računanja vremena, i subotom i nedjeljom.

(9) Odnos većih i manjih dnevnih tarifnih stavova je 2:1 po tarifnom elementu aktivna električna energija.

Član 8.

JP Elektroprivreda BiH d.d. – Sarajevo, kao imalac dozvole za snabdijevanje električnom energijom - dozvole I reda i javni snabdjevač, obavezna je na svojoj službenoj internet stranici objaviti cijene snabdijevanja krajnjih kupaca koje uključuju cijenu nabavke električne energije, cijenu usluge snabdijevanja javnog snabdjevača, kao i tarife za korištenje distributivne/prenosne mreže.

Član 9.

Početkom primjene ove odluke prestaje važenje Odluke broj 01-07-859-06/18 od 21.12.2018. godine („Službene novine Federacije BiH“ broj 104/18).

Član 10.

Ova odluka stupa na snagu osmog dana od dana objavljivanja u „Službenim novinama Federacije BiH“, a primjenjivat će se od 1.6.2024. godine.

O b r a z l o ž e n j e

Članom 109. Zakona o električnoj energiji Federacije Bosne i Hercegovine propisano je, pored ostalog, da cijene snabdijevanja krajnjih kupaca kod javnog snabdjevača predlaže javni snabdjevač na način propisan metodologijom za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača iz pravilnika koji donosi FERK, a na koji prijedlog saglasnost daje FERK, kao i da izuzetno FERK može samostalno utvrditi cijene za javno snabdijevanje ukoliko predložena cijena nije u skladu sa navedenom metodologijom. U vezi navedenog članom 11. Pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača propisano je da javni snabdjevač predlaže cijene za snabdijevanje krajnjih kupaca kod javnog snabdjevača u skladu sa metodologijom za utvrđivanje cijena snabdijevanja kod javnog snabdjevača, koja je utvrđena tim pravilnikom, kao i da ove cijene moraju biti predložene FERK-u najkasnije 60 dana prije planirane primjene istih, i da FERK daje saglasnost na predložene cijene, a u slučaju da cijene koje je predložio javni snabdjevač nisu utvrđene u skladu sa navedenom metodologijom FERK neće dati saglasnost na predložene cijene, u kojem slučaju FERK samostalno utvrđuje cijene za javno snabdijevanje. Istim članom je propisano i da je javni snabdjevač, nakon dobijanja saglasnosti FERK-a na predložene cijene, odnosno nakon što FERK utvrdi cijene, obavezan na svojoj službenoj internet stranici objaviti cijene snabdijevanja kod javnog snabdjevača koje uključuju cijenu nabavke električne energije, cijenu usluge snabdijevanja javnog snabdjevača, kao i tarife za korištenje distributivne/prenosne mreže

Članom 169. stav (1) Zakona o električnoj energiji Federacije Bosne i Hercegovine propisano je da do imenovanja javnog i rezervnog snabdjevača u skladu sa odredbama tog zakona, funkcije javnog i rezervnog snabdjevača vrše subjekti određeni Odlukom Vlade Federacije Bosne i Hercegovine o utvrđivanju pružalaca javne/rezervne usluge i usluge rezervnog snabdjevača, V broj 1811/2014 od 8. oktobra 2014. godine („Službene novine Federacije BiH“ broj 84/14). Vlada Federacije Bosne i Hercegovine je navedenom odlukom JP Elektroprivreda BiH d.d. – Sarajevo, kao nosiocu dozvole za snabdijevanje električnom energijom – dozvole I reda, dodijelila status

javnog snabdjevača sa obavezom pružanja javne/univerzalne usluge snabdijevanja električnom energijom i usluge rezervnog snabdjevača na području njegovog djelovanja.

Na osnovu naprijed navedenih odredbi, JP Elektroprivreda BiH d.d. – Sarajevo dostavila je FERK-u 9.4.2024. godine svoju Odluku o utvrđivanju prijedloga cijena javne usluge snabdijevanja JP Elektroprivreda BiH d.d. – Sarajevo broj: NO-11060/24-28./4. od 8.4.2024. godine primljenu pod brojem 07-13-2-471-1/24, gdje je u Prilogu 1 utvrđen prijedlog cijena snabdijevanja krajnjih kupaca kod javnog snabdjevača.

U cilju pravilnog i pravovremenog informiranja kupaca električne energije, FERK je obavijestio javnost o podnesenom prijedlogu cijena snabdijevanja krajnjih kupaca kod javnog snabdjevača JP Elektroprivreda BiH d.d. – Sarajevo preko svoje službene internet stranice, na kojoj je javnosti bio dostupan i sam prijedlog sa pratećom dokumentacijom i pojašnjenjima.

Članom 12. Pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača propisano je da se cijene snabdijevanja kod javnog snabdjevača sastoje od cijene nabavke električne energije, cijene usluge snabdijevanja javnog snabdjevača i cijene korištenja distributivne/prenosne mreže. U skladu sa članom 19. istog pravilnika javni snabdjevač je obavezan uz prijedlog cijena snabdijevanja kod javnog snabdjevača dostaviti FERK-u obrazloženje i sve potrebne dokaze kojima se može potvrditi struktura troškova javnog snabdjevača, ekonomičnost nabavke električne energije, kao i način određivanja cijena snabdijevanja kod javnog snabdjevača, a kao dokaze za navedeno javni snabdjevač ima obavezu uz prijedlog cijena snabdijevanja kod javnog snabdjevača dostaviti i popunjene tabele iz Priloga 1 tog pravilnika.

U prijedlogu cijena snabdijevanja krajnjih kupaca kod javnog snabdjevača iz Priloga 1 Odluke o utvrđivanju prijedloga cijena javne usluge snabdijevanja JP Elektroprivreda BiH d.d. – Sarajevo za pružanje univerzalne usluge broj: NO-11060/24-28./4. od 8.4.2024. godine je predloženo uvođenje blok tarifa za kupce iz kategorije potrošnje domaćinstvo, kao i III i IV tarifne grupe kupaca iz kategorije potrošnje ostala potrošnja. Za blok potrošnje „zeleni“, koji uključuje mjesečnu potrošnju od 0 do 268 kWh, nije predložena promjena cijene, dok je za blok potrošnje „plavi“, koji se odnosi na svaki mjesečno potrošeni kWh između 268 i 1000 predloženo povećanje obračunskog elementa aktivna energija preko 50%. Ovaj prijedlog **nije u skladu sa članom 18. stav (1) Pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača** u kojem je propisano, između ostalog, da je javni snabdjevač obavezan voditi računa o izbjegavanju naglih cjenovnih promjena za krajnje kupce koji se snabdijevaju kod javnog snabdjevača. Za kupce koji imaju mjesečnu potrošnju do 268 kWh nije predložena promjena cijena, dok velika većina domaćinstava mjesečno troši preko 268 kWh električne energije, pa bi ovim prijedlogom imali naglo povećanje cijena električne energije. FERK je mišljenja da je predložena granica potrošnje za uvedeni „zeleni blok“ (268 kWh mjesečno) izrazito niska, pa se kupci teško mogu kontrolom svoje potrošnje svrstati u potpunosti u „zeleni blok“ kako ne bi osjetili povećanje cijene električne energije. Analizirajući elektroprivredna preduzeća u okruženju, koja su takođe uvela blok tarife, vidljivo je da su granice najnižeg bloka znatno više. Tako je, na primjer, u Republici Srpskoj izvršena podjela kupaca u zavisnosti od mjesečne potrošnje: do 500 kWh, od 501 do 1500 kWh i preko 1500 kWh. U Republici Srbiji je na snazi podjela kupaca po mjesečnoj potrošnji do 350 kWh, od 351 do 1600 kWh i preko 1600 kWh, dok je u Republici Hrvatskoj izvršena podjela kupaca na osnovu polugodišnje potrošnje od 3000 kWh. U prijedlogu cijena javni snabdjevač nije obrazložio razloge za uvođenje ovakvih granica za pojedine blokove, pa nije dostavio analizu broja kupaca unutar pojedinog bloka, kao i vrste objekata.

Dalje predložene cijene za kupce I tarifne grupe kategorije potrošnje ostala potrošnja su preko 50% uvećane po tarifnom elementu aktivna energija u odnosu na važeće, dok je cijena po

tarifnom elementu obračunska snaga umanjena za 50% u odnosu na važeću, što takođe nije u skladu sa odredbama člana 18. stav (1).

U članu 15. stav (2) Pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača je propisano da troškovi snabdijevanja iznose maksimalno 15%, od ukupnog troška nabavke energije za snabdijevanje krajnjih kupaca kod javnog snabdjevača. Analizom dostavljenih podataka u prijedlogu je utvrđeno da je ovaj trošak veći od propisanih 15% što **nije u skladu sa metodologijom**. Pošto su dostavljeni samo podaci (plan broja kupaca, plan isporuke električne energije, plan obračunske snage) za period od 10.6. do 31.12.2024. godine FERK nije u mogućnosti utvrditi da li ovaj trošak na godišnjem nivou prelazi 15%.

Pošto uz prijedlog cijena nisu dostavljeni podaci o planiranoj potrošnji električne energije unutar pojedinih blokova (zeleni, plavi, crveni), tako dostavljeni podatak o predloženom povećanju ukupne cijene usluge javnog snabdjevača za kupce iz kategorije potrošnje domaćinstva od 9,8%, te predloženo povećanje cijene energije od 19% nije moguće provjeriti, a samim tim i potvrditi.

Na osnovu pažljive analize dostavljenog prijedloga cijena snabdijevanja krajnjih kupaca kod javnog snabdjevača, FERK je utvrdio da prijedlog cijena snabdijevanja krajnjih kupaca kod javnog snabdjevača, sadržan u Prilogu 1 Odluke o utvrđivanju prijedloga cijena javne usluge snabdijevanja JP Elektroprivreda BiH d.d. – Sarajevo za pružanje univerzalne usluge broj: NO-11060/24-28./4. od 8.4.2024. godine, **nije utvrđen u skladu sa metodologijom za utvrđivanje cijena snabdijevanja kod javnog snabdjevača koja je propisana Pravilnikom o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača.**

Pošto cijene snabdijevanja krajnjih kupaca kod javnog snabdjevača koje je predložio javni snabdjevač nisu utvrđene u skladu sa metodologijom za utvrđivanje cijena snabdijevanja kod javnog snabdjevača koja je propisana Pravilnikom o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača, nisu ispunjeni uslovi za davanje saglasnosti FERK-a na istu, iz kojeg razloga je FERK, postupajući u skladu sa članom 11. stav (4) Pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača, utvrdio cijene snabdijevanja krajnjih kupaca kod javnog snabdjevača JP Elektroprivreda BiH d.d. – Sarajevo, a sve u skladu sa navedenom propisanim metodologijom.

FERK je svoju odluku zasnovao na Odluci o tarifnim stavovima za korisnike distributivnog sistema Javnog preduzeća Elektroprivreda Bosne i Hercegovine d.d. – Sarajevo - Prečišćeni tekst („Službene novine Federacije BiH“, broj 99/17) i podlogama korištenim za izračun cijena ovog javnog snabdjevača koje su u primjeni.

Na osnovu prednjeg odlučeno je kao u dispozitivu ove odluke.

v.d. PREDSJEDAVAJUĆEG FERK-a
Jasmin Bešo, s.r.